

豫

章

焚

書

第二冊

豫

章

焚

書

第二册

野處類藁

二卷



欽命四庫全書總目卷一百六十

集部

野處類稿二卷

編修汪如藻家藏本

宋洪邁撰邁有容齋隨筆已著錄宋史藝文志

載邁野處類稿一百四卷瓊野錄三卷而陳振

孫書錄解題祇載有此集二卷且云前集未見

則當時傳播已稀觀馬端臨經籍考以別集詩

集分類而收此藁於別集中不知其爲詩集則

亦未見其本而循名誤載者矣惟內閣書目有

野處內外集九冊不著卷數當卽猥藁之殘本

今亦未見有傳錄者世所行邁集獨有此本而



已集前有邁自序稱甲戌之春家居卧病作詩若干首以自當緩憂之一物遂取曩時所存而未棄者錄爲二卷甲戌爲高宗紹興二十四年蓋邁退居鄱陽時所作而集中謁普照塔詩又有庚戌紀年當在建炎三年相去已二十四五歲僅得詩八十餘首又容齋三筆紀紹興十九年在福建貢院與葉晦叔所作詩正在甲戌之前而集中竝未載疑本就篋笥所貯偶然哀輯故所錄闕略如此然其生平韻語惟藉此以考見大概則零珪斷璧未嘗不足珍惜也

子自束髮卽喜學詩隨作隨棄初不留意也甲戌之
春家居卧病因復作詩若干首以自當緩憂之一物
昔人所謂內壹鬱外揚爲聲音者是也遂取曩時所
存而未棄者錄爲野處類藁二卷鄱陽容齋洪邁自
序

野處類藁卷上

宋 鄱陽洪 邁景廬 撰

秋日漫興二首

江湖久客日思家坐覺微霜上鬢華
節序又催秋後雁風光爭發雨前花
倦遊已夢莊生蝶不飲何憂廣客蛇
怪底朝來衣袖薄一川白露下蒹葭

一夕西風木葉飛畫梁落月淡餘輝
銀燈夜照還家夢金翦親裁寄遠衣
霜信早隨新雁至素書深訝故人稀
無因爲謝東曹掾鱸熟尊香莫便歸

庚戌正月十四日同友人丁晉年王蔚之謁普

照塔

孤塔聳霄漢晴影金碧眩重來得寓目歸枕尾殘沐
緬懷何姓人哀禱傾淮甸是身如皎月有水着處現
彈指遍大千何止數鄉縣惟應因緣地聊爾共流轉
顛危悔勒馬善涉悟覓扇君看悔與悟只在一轉盼
至人獨何心示此禍福變當知夙緣定莫作邪道見
哀哉眾生愚積惡稔天譴云何一朝急賴此香火薦
我來適燈夕寶蠟明邃殿還措客眼塵重睹浮屠面
朝來塔上鈴告我風色便平淮一回首岸容失葱蒨

曉過吳縣

舟行有嚴程越國常曉發雙櫓兀殘夢起坐窺落月
人家岸埜水霧雨籠邃閣遙憐瑣窗人欹枕聽甌軋
陪餘杭張無偶先生飲

先生結屋在人境門巷蕭蕭作冰冷紛紛入眼不入
意坐客千言不相領叩關聞我倒屣迎重解舊榻塵
埃生向來妙處久不吐一挽天漢崑崙傾共說別來
經世事我言所向皆兒戲胸中硯礪不用澆便有清
愁說無地士林師範六一翁先生合在伯仲中願言
終賜指歸處爲君敬作曾南豐

於潛道中

山行厭攀確理策扶欹危緣野三兩家一息知可期
冉冉晴林端炊烟裊晴暉居民豐且樂恐是太古遺
那知都邑間百索困鞭笞繁華今何有半作道旁贏
度芙蓉嶺

幽泉端爲誰放溜雜琴筑山深春未老泛泛浪蘊馥
娟娟菖蒲花可玩不可觸靈根盤翠崖老作蛙蚓蹙
蹇裳踏下流濯此塵土足何當餌香節淨洗心眼肉
餘功到方書萬卷不再讀晚歲窮名山靈苗縱穿斷
菖蒲服之通神
令人聰明健記

信州禪月臺上

玉峯點寥廓霄漢疑可梯
玉水環城陰澹澹方拍隄
層臺擅二美吾策時一携
何當蠟我屐更欲照以犀
塵勞不相赦竟類窮途迷
吾生麋鹿爾不羨駕輅驪
向來邱壑懷語發人所詆
長安黑頭公玉勒朝金闥
山林出戲言廣己無端倪
誰收遮日手歸把耕雨犁
紛紛塵土中等是舞甕雞
頗聞山水間幽子飯藿藜
行當踐此語絕境同攀躋

送渾師往妙香寺元住雲溪

道人捨幽居誰管溪上雲
此身白雲耳遑暇南北分
頗聞妙香山天花雨繽紛
宴坐丈室間歷亂舊衲紋

野處類稿卷一
山前路悠悠山後水沄沄應觀川途客念我奔走勤
豈無香火緣他年往相羣飽食跛鰻飯稀摘幽澗芹
當令枕花臺白社掩微曛

坐睡

坐久睡屢兀手失未了書清風脫然至心醒得我娛
起看過隙光了不移錙銖云何短夢中萬境生須臾
嗟彼市朝子百巧營其軀安知非夢役過眼滅無餘
至人有達觀那與世賢愚不須無言子同上崑崙墟

遊山光寺

寺藏兩山腹路轉百步陰登高試病腳掬冷清煩襟

敗壁龕山刻歲月不可尋惟應查公石俯仰閱古今
屋古園枝挂摧頽力難任何當咄嗟辦嗣彼鐘梵音
興衰豈關吾得酒且滿斟歸路有溪月攬之醒吾心

送建州徐生

人羈天地間誰非一浮萍泛然偶相值便有離合情
君家武夸下歸路塵眼明我生愛山者夢寐秀色橫
秋風送客去把手更心傾爾逢山中人爲我寄此聲

贈覺師

覺師儒門秀脫屣世故早那知軒冕味夙悟心已槁
惟餘章句習心境時相惱如人生於齊而卽楚鄉老

雖遭楚人咻微音或清好固無益生死亦未妨至道
家山亦何有骯髒衣間舊叢林選佛場一擲想盆倒
云何慰故居俛仰待華皓他年空手歸子語吾爲老
幸分曹溪水萬劫付一澡

休寧村落間有奇石如彈子渦所出宜養石菖
蒲程德藻許以餽我以詩督之

君家綠溪上岸曲溪成渦渦間石無數水蹙相蕩磨
誰嘗掬而戲一一印指螺我欲往取之擁此菖蒲窠
石罌注新汲幽姿發清哦夫子許餉我往督書已多
願言速寄與起此泉石疴

效淵明

人生本無事況我麋鹿姿一墮世網中永與林壑辭
此行獨何事豈不爲寒饑弱歲慕古人頗覺世好卑
那知齒髮邁終然此心違春風到山澤魚鳥亦知時
我行何日休流目瞻長歧且用陶翁言一觴聊可揮
酬馮退翁見示之什

我家大江左江水日夜東遙瞻發源處乃在西南窮
相望邈異境正北一水通故令我與子迹遠心自同
我生寡所諧強顏紅塵中倦飛矯歸翮饑吟咽寒蛩
獨欣得吾子萬慮一笑空時時出秀句醒我如松風